



*Minggu, 18 APRIL 2021*

**Ogen: Matius 28:16-20**



**AKU TETAP RAS KAM**



Sekalok pande ikut ibas perlumban erbahan kapal. Panitia la njelaskan kai saja saratna, sipenting kapal e la banci gedap, e ngenca. Emaka meter iban pande ndai kapal sederhana ras ringan, tapi tahan goncang ras la lit bocorna. Bas wari pertunjuken enggo idahna hasil pande si deban mejile-jile ras megah kerina. Kapalna ngenca si la merupana. Lit ka pe si nokohisa. Tapi kenca ipedalan ras inilai juri, kapal si sederhana ras ringan, tapi tahan goncang ras la lit bocorna ndai menang. Sebab idarami juri labo kapal guna ipajang, tapi kapal si banci ipake, si erguna si banci erdalan ras tahan.

Sepanjang lit gereja Tuhan lalap nge ngelakoken pemilihan man guna sierdahinNa. Pemilihan Tuhan labo erpalasken kinibeluhen manusia, sebab siapai pe mejile. Pemilihan Tuhan berdasarkan kebutuhen ras rencanaNa jine. Ia ngenca ngetehsa man kai ras bas situasi si uga sierdahinNa ndai ipakeNa. Tapi siapai pe siipilih Tuhan enggo itetapkenNa guna ndalanken sura-surana e, amin gia senembas bas penatap kemanusiaan ras doni enda banci jadi la serta. Tuhan iangkaNa kai siilakokenNa. Mawen perlu ia si metunggun, si metunggun e ipakena. Mawen perlu ia man kalak siiakap kalak si deban la metunggun, IA kap si mpetunggunkenca. Banginta selaku anak-anak Dibata eme ndalanken tanggungjawabta. Si terpilih selaku Pengurus Moderamen periode baru, dalanken dahin e, Dibata mpetunggunkenca. Man banta ngawan perpulungen, totoken, tatang ras ergaken singgo ipilih Tuhan arah pemilihan bas Sidang Sinode. Enda me si mehulina. Si terulin eme adi ersada arihta mpembarken berita si meriah sue ras kapasitasta masing-masing, alu tetap ersukuten man Tuhan bageme amanat sidang Sinodeta. Perlu tetap siinget maka kita kerina me kap GEREJA si arus jadi pasu-pasu man doni enda. Tuhan tetap ras kita.